



## Miene kammeraod

Ik dink, det 't zeker zôn 25 jaor geleeje waas, det ik um veur de letste kiër gezeen had, mienen alde kammeraod Baer Piëters. Maar wie det zoë geit, op eine gooien kwaojen daag, leep ik um paaf taeg 't liëf aan, midde op de vleisstraot. Ik zek, maar Baerke Piëters, waat bis dich veranderd. Dao keek dae mich aan, wie eine boetsauto, op de schandelose kermes.

De hes 't verkiërd, zaette, ik bin neet Bae.....

Ik zek maar jông, waat bis dich groët gewaore, want det waas iërs zôn klein druubelke, asse 2 törve opein zoots, kôs dae ein verke presies in zien gaat kiëke.

Ik zek, en, bisse nog altiëd veurman pannesorteerder beej Canoy Herfkes ?

Nae nae zaette, ik bin neet Bae.....

Ik zek, maar maar, waat bis dich veranderd, as jônge snuiter, waas dich altiëd zônne graotendeef, en noow hesse eine kop wie einen eimer van 25 liter.

Nae ech neet zaette ik bin neet Bae.....

Ik zek, maar Baer, de bis auk al van vrouw veranderd zeen ik, dien iërste vrouw waas toch zôn echte haai baai, met zôn lange haor op de tand, desse d'r ein permanentje in kôs ligge.

Nae zaet Baer, dit is mien iërste vrouw, want ik bin neet Bae.....

Ik zek, waat zeen ik noow, bisse beej d'n plastische chirurg gewaes?

Want wetse, dae had dich ein paar flappers aan de kop, dae kôs zoë veur de wannevleeger doorgaon, en zoë te zeen, hadde ze zien lui aug, auk weer aan 't fiete gekrege.

Noow mósse ens luistere zaet dae, ik kin dich misse as kalde pap, want ik bin neet Bae....

Mao., ik zek en dan dien haor, dich hads tösse de rispels altiëd zôn breije schei, hesse dao ein toepetje op geplek.

Dao woort dae toch giftig, en auk nog kwaod.

Halt noow ens diene retteketed, reep dae midde op de vleisstraot.

Ik heit neet Baer Piëters, ik heit Sjaak Haoves, en dao leep dae zoëmaar weg.

Goh, det had ik noow noeits achter Baer Piëters gezôch, det dae auk nog ziene naam zoel verandere.

Stôm hê.

Wiel Hermans Venlo